

èxtra
ARUBA
Cu asistencia record

COLONIA COLOMBIANO A CELEBRA ANIVERSARIO DI INDEPENDENCIA

ORANJESTAD (APA) ---

Diabierne, 28 di Juli, tabata e dia grandi pa e colonia Colombiano na Aruba, cu pa motibo di luto nacional (morto y entierro di Daniel Leo) no por a celebra e di 179 aniversario di su Independencia dia 20 di Juli último. Despues di e ofrenda floral cu Asociacion "Amigos de Colombia" a organizá den oranan di mainta, cu por cierto a conta cu un asistencia basta grandi, e climax a yega, ora cu anochi Club "Villa Nostra" a resultá demasiado chiquito pa carga e enorme cantidad di Colombiano y amigonan di Colombia cu a acudí na e fiesta.

Pa 9'or di' anochi ya "Villa Nostra" tabata yen-yen di hende cu a bin demostrá, cu enberdad ta existi lazonan hopi estrecho di amistad y cooperacion entre Colombia y Aruba y cu e lazonan aki di

ningun manera por ser kibrá.

Entre e invitadonan di honor nos por a mira Promé Minister Nelson Oduber, Presidente di Parlamento Felix Flanegin y parlamentario Didi Wernet, tur tres di e partido MEP. Dor di e enorme cantidad di hende, nos no por bisa cu seguridad, si miembronan prominente di otro partidonan tambe a duna oído na e invitacion. Nos nó a mira nan y si nan nó a presentá, esey ta di lamentá, ya cu aki sigur no tabata trata di ningun acto político, sino di aprecio y amistad pa cu nos bisña Colombia.

E anochi festivo a cuminzá cu e parti cultural, cu a encerrá música y baile di diferente parti di Colombia, cu a caí masha na agrado di e concurrencia. E demostracion impecable di'e diferente estilonan di baile tabata na

encargo di un pareha hoben, cu sin lugar a duda ta priminti hopi pa futuro.

Despues di e parti cultural tabatin discursonan di tanto e presidente di'e Asociacion "Amigos de Colombia", Ramón Todd-Dandaré, como di Promé Minister Nelson Oduber y por último, di'e Colombiano/Arubano Hendrik Croes, kendenan a enfatizá e lazonan di amistad y cooperacion cu semper a existi entre Colombia y Aruba, alavez a haci un apelacion fuertísimo riba gobierno di Colombia, pa no laga e colonia Colombiano na caya y reconsiderá su decision pa próximamente sera e Consulado Colombiano na Aruba. Seguidamente tabatin entrega di placa conmemorativo na algun miembro di nos comunidad cu di un forma of otro a contribuí na promo-

cion di e folklore Colombiano riba nos isla. Un di'e personanan cu merecidamente a ricibi un di placanan aki ta Vicente Kelly, kende ratonan despues a tuma encargo di e parti bailable, presentando su extenso repertorio di Cumbia, Vallenato y Merenguenan Colombiano, cu a percurá pa e pista di baile constantemente tabata repleto di hende.

Tur hende, Colombiano y amigonan di Colombia a baila, a goza y a disfrutá a plenitud di un anochi inolvida-

ble. Cu un asistencia record, un tremendo cushina crioyo y mas "Aguardiente" cu bo por haya den e bar di Chalo na Manizales, tanto Asociacion "Amigos de Colombia" como e colonia Colombiano na Aruba por mira bek riba un tremendo celebracion di'e di 179 aniversario di Independencia di Colombia na Aruba. Un sincero PABIEN ta bal di nos parti na e organizadonan cu a traha hopi duro pa por a haci Diabierne, 28 di Juli 1989, un éxito den tur sentido di palabra.